

Bosna i Hercegovina

Federacija BiH

Kanton Sarajevo

Skupština Kantona Sarajevo

5.radna sjednica

ZASTUPNIČKO PITANJE

n/p predsjedavajućeg, gosp. Elmedin Konaković

Oboljeli od karcinoma ovih dana u bolnicama dobijaju odgovore da citostatika nema, odnosno da ih moraju sami nabaviti, iz Zavoda zdravstvenog osiguranja i reosiguranja Federacije BiH za sve krive proces javnih nabavki, dobavljače, ali i proizvođače lijekova.

Problem sa nestašicom lijekova nije od juče, on traje već dugo, tako da je očigledno da je ovaj način organizacije planiranja i nabavke lijekova za onkološke pacijente pogrešan, te je očigledno jasno da ga je neophodno promijeniti, a sve sa ciljem poboljšanja liječenja onkoloških pacijenata.

Zavod zdravstvenog osiguranja i reosiguranja Federacije BiH obavezan je provoditi postupke javnih nabavki za svaki lijek, pa i za citostatike, u skladu sa Zakonom o javnim nabavkama, i potpisati ugovore o nabavci i isporuci lijekova sa ugovornim veldrogerijama/dobavljačima koji se obavezuju, između ostalog, i na kontinuiranu isporuku ugovorenih lijekova.

Nakon potpisivanja takvih ugovora, Zavod nema mogućnost za nabavku lijeka od drugih dobavljača u slučajevima kada je lijek deficitaran, pa i u slučajevima kada na tržištu postoji generička paralela drugog proizvođača.

Međutim, s obzirom na to da o izboru najpovoljnijih ponuđača za nabavke lijekova, uključujući citostatike, odlučuje FZZO, odgovornost Zavoda za neispunjene ugovorene obaveze dobavljača ne može se zaobići.

Nadležni ističu kako do periodičnih nestašica lijekova u Federaciji dovodi i nedostatak sredstava u Fondu solidarnosti koji onemogućava stvaranje optimalnih zaliha lijekova u zdravstvenim ustanovama za duži period.

Naime, sredstva federalnog Fonda solidarnosti se osiguravaju iz doprinosa za obavezno zdravstveno osiguranje i dijelom iz sredstava Budžeta Federacije BiH putem transfera Federalnog ministarstva zdravstva.

Fond solidarnosti već godinama posluje sa ogromnim gubicima koji su prvenstveno nastali zbog neuplaćivanja sredstava iz Budžeta FBiH na račun Fonda, uprkos tome što je zakonom propisano da je obaveza federalne Vlade da osigura i uplati na račun federalnog Fonda solidarnosti sredstva jednaka onima koja su prikupljena od doprinosa.

Zbog značaja lijekova za zdravlje i život građana, očekivano je da u ovoj oblasti procedure budu jednostavnije i brže. U praksi, ipak, i ovu oblast Zakon opterećuje čak i više u odnosu na druge oblasti. Naime, nabavka citostatika i drugih lijekova nema nikakav prioritet u procedurama nabavke, kao ni u žalbenim postupcima, pa se dešava da se zbog neosnovanih žalbi tender mjesecima stopira, što dovodi do nestašica lijekova

Bolesnici i to oni najteži ne mogu čekati, a hitni pregovarački postupci u koje se kasnije krene često budu prekasno za one kojima lijek treba. Pacijentima koji ovise o citostaticima, bolest može napredovati, a njihovo opće stanje znatno se može pogoršati bez potrebne terapije. Dok traje nestašica citostatika, FZZO refundirat će troškove pacijentima za lijekove koje moraju sami nabavljati, ali je pitanje da li ti pacijenti imaju novac za kupiti tako skup lijek. Očigledno je da se za funkcioniranje Fonda solidarnosti, koji se iz godine u godinu suočava sa sve većim problemima, moraju hitno tražiti drugačija sistemska rješenja.

Zamolila bih našu Vladu i resorno ministarstvo da se uključi u ovaj proces, te sa svojim kapacitetima, u saradnji sa nadležnim institucijama i Vladom FBiH, pokuša pomoći u reformisanju očigledno pogrešno postavljenog sistema koji iz godine u godinu ponavlja svoje slabosti kroz utvrđivanje odgovora na slijedeća pitanja:

- 1. Na koji način se vrši procjena nabavke citostatika, te da li je moguće izvršiti nabavku određenih rezervi lijekova kako nam se ovakva situacija ne bi ponavljala iz godine u godinu?**
- 2. Da li Vlada FBiH može uplatiti svoj dio obaveza po pitanju Fonda solidarnosti, pa da se osiguraju nedostajuća sredstva kojim će se nabaviti odgovarajuće rezerve lijekova?**
- 3. Da li postoji mogućnost da Agencija za javne nabavke izvrši određenu intervenciju kroz prioritarno rješavanje ovakvih postupaka ili eventualno izradu uputstva po kojem će se ovakvi postupci od kojih ovise životi ljudi učiniti efikasnijim nego što je slučaj zadnjih godina?**

Sarajevo, 27.02.2019.

Segmedina Srna Bajramović

Zastupnica SDP BiH u SKS